



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

*Komunikadu Imprensa*  
**17 Setembru 2014**

## **Prezidente Taur Ezije Parlamentu Altera Lei Pensaun Vitalisia no Aprova Lei Anti Korupsaun**

Iha 15 Setembru 2014, Prezidente Repúblika Taur Matan Ruak ezije ba Parlamentu Nasionál (PN), iha sesaun solene abertura terseriu lejislatura PN atu fó prioridade ba diskusaun no aprovasaun Projeto Lei Anti Korupsaun, Lei ba Rai, Lei Protukolu Estadu no Alteirasaun ba Lei Pensaun Vitalisia.

Prezidente Taur Matan Ruak hato'o lia hirak ne'e iha sesaun solene ba membru deputadu sira depois resesu durante fulan ida iha loron primeiru sira tama servisu. Prezidente Taur Matan Ruak realsa katak, atu kombate korupsaun tenki haforsa ho Lei Anti Korupsaun no alteira lei sira ne'ebé la fó benefisiu ba povu hanesan lei Pensaun Vitalisia no sira seluk tan.

“JSMP apoiu ezijensia Prezidente Repúblika Taur Matan Ruak, tanba JSMP observa katak, to'og agora PN la dezenvolve planu lejislativu nasional atu identifika prioridade lejislativu kada tinan lejislativu sira. Ne'e defisil teb-tebes ba PN nasional kuandu la iha politika nasional ida ba prioridade lejislativu”, dehan Luis de Oliveira Sampaio, Diretór Ezekutivu JSMP.

JSMP hanoin katak winhira PN bele dezenvolve planu lejislativu nasional ne'e sei fasilita PN atu identifika prioridade lejislativu kada tinan. Ne'e inklui alterasaun ba Lei Pensaun Vitalisia no Lei Anti Korupsaun ne'ebé dalabarak deputadu sira so halo deit deklarasaun politika iha PN sein halo intervensaun lejislativu ka asaun konkreta atu reforsa instituisaun sira ne'e.

Iha Prezidente Taur nia diskursu konsidera korupsaun ne'e hatohik estadu no hafraku nasaun tanba deskoraja investimentu esternu no hamosu instabilidade institucional. Tanba ne'e Prezidente Taur sujere atu hametin servisu investigasaun kriminal no tribunál sira tenki metin hodi hasoru korupsaun no tenki servisu ho independensia no sein iha interferensia.

Prezidente Taur mós rekoñese kritika balu hasoru nia kona-ba indultu ne'ebé foin lalais nia fó ba prizioneiru sira iha loron referendum. Maibe Prezidente dehan justisa la'ós de'it ho objetivu atu fó kastigu ba ema. Justisa mós iha objetivu atu rehabilita no kontribui hodi reintegra dadur sira ba iha sosiedade. Tanba ne'e indultu sira nunka sai nu'udar interferensia ida ba servisu tribunál nian no utilizasaun indultu mós la'ós interferensia ida ba justisa maibe nu'udar kompetensia ida ne'ebé Konstituisaun fó ba Prezidente Repúblika.

Asuntu seluk ne'ebé Prezidente Taur koalia durante nia diskursu mak hanesan; asuntu unidade politika no sosial, reforma ba ekonomia, saude, edukasaun, jéneru, infrastrutura no veteranu.

Prezidente mós apela ba entidades hotu liu-liu ba mane maluk sira atu hakribi violénsia kontra feto no promove tulun familia liuhosi eduksaun ne'ebé di'ak, saude di'ak hodi hamutuk hari'i uma kain ne'ebé forte no kontribui ba hadia dezvoltamentu ekonomia familia nian.

Prezidente informa kestaun ne'e, tanba hare'e feto barak sei sai vítima hosi sira nia laen kaben ne'ebé loloos atu proteze sira nia feen ho oan sira. Maibe sira hetan fali violénsia doméstika ho natureza fisika simples no grave ka mall trata iha sira nia uma laran rasik.

Partisipa iha sesaun solene ne'e inklui Primeri Ministru ho nia membru governu sira, diplomata no sosidade sivíl.

Atu hetan informasaun kle'an liután favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

Telefone: 3323883 | 77295795

Website: [www.jsmp.tl](http://www.jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPtl